



Komunikadu Imprensa

Periodu: 2011

Edisaun: 5 Outubru 2011

Tribunál Distritál Dili julga kazu omisídiu agravadu hasoru nia kónjuje

Iha loron 29 fulan Setembru 2011, Tribunál Distritál Dili hala'o audensia julgamentu hodi rona deklarasaun husi arguidu no testamuña ba kazu omisídiu agravadu hasoru kónjuje. Kazu ne'e akontese iha Suco Vatubou, Sub Distritu Maubara, Distritu Liquiça, iha loron 9 Novembru 2009 no rejistadu iha tribunál ho Nu. Prosesu 292/C.ord/TDD/2009. Kazu refere komete husi arguidu IDS hasoru vítima Anabela da Conceição ne'ebé mak nu'udar arguidu nia kaben rasik.

Julgamentu ba kazu ne'e prezide ho kompozisaun husi juiz koletivu mak hanesan Dr. Costancio Basmery hanesan juiz presidente, akompaña husi Dra. Jacinta Correia no Dr. Alvaro Freitas. Parte Ministériu Públiku, representa husi Dr. Hipolito Martins Santa no arguidu rasik hetan assistensia legál husi Dra. Olga Barreto Nunes husi eskritoriu Defensória Pública.

Diretór Ezekutivu JSMP, Luis de Oliveira Sampaio, haktuir katak: *“aktu krimi ne'ebé komete husi arguidu hasoru nia kónjuje, konsidera nu'udar krime omisídiu agravadu tanbá ne'e husu ba tribunál kompetente hodi hamonu pena ne'ebé justu bázeia ba gravidade krime ne'ebé arguidu komete”*.

Bázeia ba akuzasaun ne'ebé mak lee husi Juiz, Ministériu Públiku apresenta faktus no kronolojia akontesementu katak; iha loron 9 Novembru 2009, maizumenus iha oras tuku 6 lorokraik, vítima ba ke'e kumbili iha to'os. Iha momentu ne'ebá arguidu la hatene katak ema ne'ebé mak ke'e kumbili ne'e arguidu nia fen rasik, no arguidu hasee vítima, maibé vítima lahatan. Arguidu hanoin vítima naok ten ida, tanbá ne'e arguidu foti fatuk tuda ba vítima dala rua, primeiru kona iha tilun hun no segundu kona iha hirus matan to'o vítima monu ba rai. Arguidu mos halai kedas ba atu hare no wainhira nia to'o iha fatin akontesementu, arguidu hare katak vítima ne'e ninia fen rasik. Iha momentu ne'ebá arguidu lori kedas vítima ba iha hospital hdoi hala'o tratamentu, maibe liu tiha loron ha'at vítima mate.

Bazea ba kronolojia kazu refere, Ministériu Públiku akuza arguidu, komete krime omisídiu agravadu hasoru vítima ne'ebé mak hanesan nia kaben rasik, nu'udar defini iha artigu 139 (g) Kódigu Penál Timór Lesté ho moldura penál husi tinan 12 to'o 25 iha prizaun.

Bázeia ba observasaun iha audensia julgamentu ne'e, JSMP nota katak; tantu arguidu, testamuña sira mos lakohi fo sira nia deklarasaun iha tribunál no hili direitu atu nonok, bázeia ba artigu 125 KPP Timor Lesté.

Tribunál marka fali data audensia julgamentu ne'e ba loron 28 Outubru 2011, oras tuku 14.30 lorokraik hodi rona deklarasaun husi testamuña seluk.

Atu hetan informasaun kle'an, favor kontaktu:

Luis de Oliveria Sampaio

Diretór Ezekutivu JSMP

Email: luis@jsmp.minihub.org

Landline: +670 3323883